

**Khairy ramal DAP main isu PPP-Gerakan dalam p'raya Machap
Malaysiakini.com
March 24, 2007**

Naib Ketua Pemuda Umno Khairy Jamaluddin meramalkan DAP akan membangkitkan perbalahan antara dua parti komponen Barisan Nasional (BN) dalam kempen pilihanraya kecil Machap pada 12 April ini.

"Percakaran kecil antara Parti Progresif Penduduk (PPP) dan Gerakan itu sebenarnya sudah diselesaikan, dan di peringkat Pemuda BN, tiada masalah," katanya kepada pemberita di Rembau hari ini.

Pilihanraya kecil itu diadakan berikutan kematian Pengerusi MCA Melaka, Datuk Wira Poh Ah Tiam, 55, pada 15 Mac lalu akibat kegagalan buah pinggangnya.

Menurut laporan Bernama, Khairy mendakwa pembangkang akan cuba menutup kelemahan sendiri dengan mengalih tumpuan kepada masalah dalaman BN.

"Kita semua tahu DAP akan bertanding di Machap tetapi Parti Keadilan Rakyat (PKR) membuat pengumuman mereka sanggup memberi laluan kepada DAP, dengan syarat mereka (PKR) bertanding di Machap pada pilihanraya umum akan datang.

"Itu menunjukkan tidak ada kesepakatan antara parti pembangkang, sedangkan kita dalam BN, walaupun ada sedikit percakaran, tapi dapat diselesaikan," katanya.

Menurut Khairy lagi, Pemuda Umno sudah bersedia untuk pilihanraya kecil itu dan telah mengenal pasti beberapa kawasan yang akan menjadi tumpuannya.

Katanya, pergerakan itu akan memastikan BN menang dengan majoriti yang besar daripada dahulu.

Pada pilihanraya umum 2004, Poh menewaskan Liou Chen Kuang dari DAP dengan majoriti 4,562 undi.

Penamaan calon ialah pada 3 April ini.

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/64999>